

BOSNA I HERCEGOVINA
FEDERACIJA BOSNE I HERCEGOVINE
SREDNJOBOSANSKI KANTON/ KANTON SREDIŠNJA BOSNA
OPĆINSKI SUD U KISELJAKU
Broj: 49 0 K 074739 25 K
Kiseljak, 07.04.2025. godine

U IME FEDERACIJE BOSNE I HERCEGOVINE

Općinski sud u Kiseljaku, po sutkinji Orman Šerbo Rasemi kao sutkinji pojedincu, uz sudjelovanje zapisničarke Bošnjak Dajane u krivičnom predmetu protiv optuženog K.A., zbog krivičnog djela Nasilničko ponašanje iz člana 362. stav 2. u vezi sa članom 31. Krivičnog zakona Federacije Bosne i Hercegovine, po optužnici Kantonalnog tužilaštva Travnik broj:T06 0 KT 0033478 23 od 21.10.2024. godine koja je pred ovim sudom potvrđena dana 04.11.2024. godine, nakon održanog ročišta za razmatranje izjave o priznanju krivnje i pretresa za izricanje krivično pravne sankcije u prisustvu optuženog K.A. i Kantonalnog tužitelja S.S., dana 04.04.2025. godine donio je a dana 07.4.2025. godine javno objavio:

P R E S U D U

OPTUŽENI:

K.A. sin S. i majke S. dj. M., rođen godine u T., nastanjen u ul. M. S. br. ..., općina F., ..., državljanin BiH, JMBG:, pismen, završena SSS, po zanimanju medicinski tehničar, neoženjen, bez djece, vojsku nije služio, ne vodi se u VE, srednjeg imovnog stanja, po izjavi neosuđivan.

K R I V I J E

Što je:

Dana 15.07.2023.godine, oko 00,30 sati, u ul. Š. ..., općina F., u ugostiteljskom objektu „Parlament“, zajedno sa E.H. i A.H. nasiljem prema drugom te naročito drskim i bezobzirnim ponašanjem ugrozio građanski mir i pri tome lako tjelesno ozlijedili oštećenog A.B., na način da je E.H. prišao za stol i upozorio oštećene A.B. i T.F. da ne prave buku i da ne razbijaju čaše, da bi potom E.H. uhvatio za vrat oštećenog A.B. i zadao mu više udaraca šakom u predjelu glave, usljed čega oštećeni A.B. pada na pod, nakon čega mu E.H., optuženi A.K. i A.H. nastavljaju zadavati veći broj udaraca rukama i nogama po cijelom tijelu, svjestan da navedenim ponašanjem, ugrožava građanski mir, kao i da zadavanjem udaraca oštećenom A.B. može nanijeti tjelesne povrede, što je i htio i kojom prilikom je oštećeni A.B. zadobio lake tjelesne povrede u vidu: ubodne rane u području lijeve natkoljenice i nagnječenje o području pogravine, nakon čega je oštećenom pružena liječnička pomoć u Domu zdravlja Fojnica.

Čime je počinio krivično djelo Nasilničko ponašanje iz člana 362. stav 2. u vezi članom 31. Krivičnog zakona Federacije Bosne i Hercegovine.

Pa ga sud primjenom iste zakonske odredbe te primjenom člana 7., 42., 43. i 49. Krivičnog zakona Federacije Bosne i Hercegovine.

O S U Ć U J E

NA KAZNU ZATVORA U TRAJANJU OD 6 (ŠEST) MJESECI

Na osnovu odredbe člana 202. Zakona o krivičnom postupku Federacije Bosne i Hercegovine optuženi se obavezuje na plaćanje troškova sudskog postupka u iznosu od 120,00KM (stotinu dvadeset konvertibilnih maraka) i troškova sudskog paušala u iznosu od 100,00 KM (stotinu konvertibilnih maraka) u roku od 15 dana od dana pravosnažnosti presude.

O b r a z l o ž e n j e

Kantonalni tužilac u Travniku optužnicom broj:T06 0 KT 0033478 23 od 21.10.2024. godine optužio je E.H., A.H. A.H i K.A. zbog krivičnog djela Nasilničko ponašanje iz člana 362. stav 2. u vezi sa članom 31. Krivičnog zakona Federacije Bosne i Hercegovine.

Ova optužnica od strane sudije za prethodno saslušanje Općinskog suda u Kiseljaku je potvrđena dana 04.11.2024. godine, na ročištu za izjašnjenje o krivnji dana 10.02.2025.godine optuženi E.H, A.H i A.H. su se izjasnili da nisu krivi dok je optuženi K.A. izjavio da je kriv za krivično djelo koje mu se predmetnom optužnicom stavlja na teret.

Imajući u vidu navedeno izjašnjenje optuženih na temelju odredbe člana 33. ZKP F BiH sud je donio rješenje kojim je postupak u odnosu na optuženog K.A. razdvojio kako bi se održalo ročište za razmatranje izjave o priznanju krivnje i pretres za izricanje krivične sankcije.

Na ročištu za razmatranje izjave o priznanju krivnje dana 04.04.2025. godine sud je nakon saslušanja optuženog K.A. zaključio da je optuženi krivnju priznao dobrovoljno, svjesno i sa razumijevanjem, te bez ičije prisile ili nagovaranja, pa je ovo priznanje prihvaćeno.

Budući da je sud utvrdio da je optuženi K. A. izjavu o priznanju krivnje dao u skladu sa odredbom člana 245 st. 1 tačka a) ZKP F BiH sud je također našao nespornim da se 15.07.2023. godine oko 00:35 sati u ugostiteljskom objektu „Parlament“, ul.Š., općina F., desio predmetni događaj a što potvrđuju Službena zabilješka o prijemu usmene krivične prijave PS Fojnica broj :02/6-5-1-04-2-246/23 M.Č. od 15.07.2023. godine, Službena zabilješka PS Fojnica broj: 02/6-5-04-1-562/23 od 15.07.2023. godine, Službena zabilješka PS Fojnica broj:02/6-5-04-2-566/23 od 15.07.2023. godine, Zapisnik o uviđaju PS Fojnica broj: 02/6-5-1-04-2-12/23 od 15.07.2023.godine, zatim sud je našao na temelju iskaza svjedoka F.T. koji je na Zapisnik PS Fojnica od 17.03.2023. godine i Zapisnik PS Fojnica od 14.09.2023. godine izjavio da je tu noć bio u ugostiteljskom objektu „Parlament“ u srednjem dijelu

objekta, da se sve događalo na udaljenosti od njega na nekih 2-3 metra. U jednom momentu je vidio da nekog tuku E.H. i A.K., pošto je mislio da se radi o njegovom rođaku došao je do tog mjesta gdje su oni bili. Na prelazu između dva dijela gdje se nalazi jedna stepenica vidio je zaštitara A.H. kako palicom na razvlačenje udara po cijelom tijelu T.F. koji je u tom momentu ležao na podu. On je krenuo do mjesta gdje su E. i A. tukli nekoga i dalje misleći da se radi o njegovom rođaku, a kada im je prišao vidio je da se radi o A.B. kojeg poznaje od ranije. U tom momentu A. je bio u ležećem položaju na podu, a E. i A. su ga udarali nogama, rukama i laktovima po tijelu. Kad god je A. pokušao ustati oni su ga vraćali na tlo udarcima. U jednom momentu kada je A. ponovo krenuo da ustane vidio je kako ga A. udara nogom, ali nije siguran da li ga je pogodio u glavu ili rame. Kada je shvatio da se ne radi o njegovom rođaku okrenuo se i otišao da potraži sestru i nije vidio šta se dalje dešavalo.

Medicinska dokumentacija u vidu podataka Dopis JU Dom zdravlja Fojnica broj:13-33-533-1/23 od 26.07.2023.godine sa očitovanjem o povredama za T.F. i A.B., Nalaz/Prijava o ozljedi JU Bolnica Travnik, Hirurško tramatološka služba na ime A.B. od 21.07.2023. godine, je bila osnova za izradu nalaza i mišljenja vještaka dr. M.B., a po naredbi Kantonalnog tužilaštva Travnik broj: T06 OKT 0033478 23 od 21.03.2024. godine. Vještak je u svom nalazu i mišljenju od 28.03.2024.godine utvrdio da je oštećeni A.B. zadobio lake tjelesne ozljede u vidu ubodne rane u području lijeve natkoljenice i nagnječenja u području glave.

Imajući u vidu da je priznanje optuženog dato pred ovim sudom u cijelosti potvrđeno prezentiranim dokazima to je sud u cijelosti i prihvatio njegovu izjavu o priznanju krivnje koju je optuženi K.A. dao pred ovim sudom dana 10.02.2025. godine, te optuženog K.A. prethodno ne nalazeći okolnosti koje isključuju ili umanjuju krivičnu odgovornost oglasio krivim zbog izvršenja krivičnog djela djelo Nasilničko ponašanje iz člana 362. stav 2. u vezi sa članom 31. Krivičnog zakona Federacije Bosne i Hercegovine.

U završnom izlaganju zastupnik optužbe je predložio sudu da prilikom odlučivanja o izboru vrste i visine kazne kao otežavajuću okolnost na strani optuženog cijeni način izvršenja krivičnog djela te jedan visok intenzitet koji je A.K. iskazao kada je nakon što je oštećeni A.B. pao na pod nastavio istog udarati a olakšavajuću okolnost da je priznao izvršenje krivičnog djela i raniju neosuđivanost.

Optuženi K.A. u završnom izlaganju je izjavio da se kaje zbog počinjenog krivičnog djela.

Za krivično djelo djelo Nasilničko ponašanje iz člana 362. stav 2. u vezi sa 31. Krivičnog zakona Federacije Bosne i Hercegovine može se izreći kazna zatvora u trajanju od šest mjeseci do pet godina.

Prilikom odlučivanja o vrsti i visini krivične sankcije za počinjeno krivično djelo cijene su sve okolnosti koje su propisane članom 49. KZ F BiH te krećući se u granicama propisane kazne, cijeneći svrhu kažnjavanja propisanu u članu 42. KZ F BiH te uzimajući okolnosti koje utiču da kazna bude manja ili veća odlučio kao u izreci presude.

Na strani optuženog K.A. sud je kao olakšavajuću okolnost cijenio činjenicu da je priznao izvršenje krivičnog djela i na taj način doprinio bržem i ekonomičnijem okončanju ovog krivičnog postupka, kao i to da do sada nije osuđivan, a što je nesporno utvrđeno uvidom u izvod iz kaznene evidencije za optuženog izdat od PS Travnik broj:02/7-3-04-2-4-425/23 od 12.9.2023.godine.

Na strani optuženog kao otežavajuću okolnost sud je cijenio okolnosti izvršenja krivičnog djela i to okolnosti koje se tiču načina izvršenja krivičnog djela. Naime nakon što je E. H oštećenom A.B. zadao više udaraca šakom u predjelu glave, usljed čega je oštećeni A.B. pao na pod, optuženi K.A. zajedno sa E.H. i A.H., nastavlja oštećenom B.A. zadavati veći broj udaraca rukama i nogama po cijelom tijelu nanoseći mu pri tome povrede. Ovakvim ponašanjem optuženi je iskazao visok stepen bezozirnosti u činjenju krivičnog, jer zajedno sa optuženim E.H. i A.H nanosi povrede oštećenom A.B. koji leži u bespomoćnom položaju bez mogućnosti da izbjegne napad na bilo koji način.

Iz navedenih razloga sud je, imajući u vidu navedene olakšavajuće okolnosti optuženog K.A. osudio na minimalno propisanu kaznu zatvora u trajanju od šest mjeseci te smatra da je ovo sankcija koja će moći ostvariti svrhu kažnjavanja tj. da se izarzi društvena osuda počinjenog krivičnog djela, da se utječe na učinioca da u buduće ne počini krivična djela i potakne njegovo prevaspitanje, da se utječe na ostale da ne počine krivična djela i da se utječe na svijest građana o pogibeljnosti krivičnih djela i o pravednosti kažnjavanja učinilaca kako je to propisano u članu 42 KZ F BiH.

O pravima oštećenog B.A. sud nije ni odlučivao u ovom postupku budući da isti nije dao nikakvo izjašnjenje u vezi zahtjeva za nakandu štete.

Temeljem odredbe člana 202. ZKP F BiH optuženi je obavezan na plaćanje troškova sudskog postupka u visini od 120,00 KM a koji se prema troškovniku KT Travnik broj:T06 0 KT 0033478 23 od 16.10.2024.godine odnose na isplaćene troškove vještaku medicinske struke dr. M.B. za izradu nalaza i mišljenja. Pored ovih troškova optuženi je obavezan i na plaćanje sudskog paušala u iznosu od 100,00 KM. Visina paušala je određena obzirom na dužinu trajanja, složenost postupka i imovinske prilike optuženog,

Zapisničar

S U T K I N J A

Bošnjak Dajan

Orman-Šerbo Rasema

PRAVNA POUKA

Protiv ove presude može se izjaviti žalba u roku od 15 dana od dana prijema iste Kantonalnom sudu u Novom Travniku, a putem ovoga suda. Žalba se podnosi u 3 primjerka.